

# O LE SULU SAMOA



EKALEZIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839 O LE SULU SAMOA TESEMA 2024

MAOTA FOU I LE NOFOAGA FOU, EFKS LELEPA



MAFUTAGA AUTALAVOU AOAO 2024



Autalavou Matagaluega Faleata sauni mo le Pese Samoa i le Mafutaga Aoao 2024

---

## O LE FAASINO UPU

1. O LE LAUGA	2
2. FEAU O LE KERISIMASI	4
3. FEAU O LE ASO	6
4. O LE PEROFETA MULIMULI	8
5. GALUEGAA AULOTU	14
6. MAFUTAGAAUTALAVOU AOA O	14
7. O E UA FAI I LAGIFOLAUGA	15
8. ATA O MATAUPU LOMIA	16

## O LE LAUGA

Matua: Ruta 1: 6a & 7, “*Ua tu i luga o ia ma avā a ana tama... Ona alu ese ai lea o ia mai le mea sa i ai, o ia ma avā a ana tama e toalua faatasi ma ia; ua latou ui i le ala e foi mai ai i le nuu o Iuta.*”

### Manatu Autu: Feagai ma lagona maoaluma (Facing Regret)

O le lagona maoaluma, e maua ina ua lē taunu’u fuafuaga, sa afuafua ma faataatia mai i le amataga. Pe o ni fuafuaga lelei tau le atina’e, mo le manuia lautele o aiga, nuu ma Ekalesia, pe o ni faamoemoega faaupufai o malo, pe o ni faufauga faatogafiti mo se manuia faapito o se toaititi, se tautoga po o se folafolaga tau faigauo, po o le a lava se ituaiga fuafuaga e fai; a e afai e alu alu, ua iloa le galu na ona faafua a e lē fati, ua faaselemutu ma ua lē taunuu, ona oo lea i le tulaga o le maoaluma. Na te aumai faatasi ma lagona o le maasiasi, o le faanoanoa, o le tiga i le oona ma le matuitui, ina ua lē tau lau, ua lē tali mai, ua lē fua mai, mea tetele sa moemiti i ai.

E pei o le muagagana a le atunuu, Ua lē o gatasi le futia ma le umele, a ua tusa ma le isi foi upu, faasino i le lautaamū na sālufale a Aopo. Ae fai mai le Failauga, “*O le faamoemoe ua tuai ona taunuu, e faanoanoa ai le loto...*” E tuufaafegaai ma le fiafia, ina ua taunuu faamoemoega, o le laau o le ola lea.

E masani ona gagana le tagata ua maoaluma, ‘Pe ana ou iloa, o le i’uga lea e oo i ai, semanū e ese se filifiliga, ese se faai’uga, ese se gaoiiga ou te faia.’ O ni moomooga faivavale ia, a ua tuai, ua maoaluma. Talofa e, ‘E tagi fua Vi, a ua i le vaa o Enelī.’

I le isi itu, o le maoaluma, e i ai lona itu lelei. O le upu e tupuga mai ai, ma faavae ai le lagona o le salamō; le faanoanoa ina ua iloa, ua lape le faautaga, ua ‘ela le faatofalaiga. Le lagona lea, e fesoota’i tonu ma le mana’o e toe foi, e toe fuata’i, e toe fai se suiga, ma se amataga fou.

Fai mai le finauga a le alii Faifeau Foma’i o Gregory Goswell, o le Tusi a Ruta, o le tala e autu ia Ruta, a e ogatotonu ia Naomi. E sa’o lea manatu, auā foi o Naomi na fanaua, o Naomi na amata ai. O le tina o le aiga Peteleema Iutaia. Le aiga na sailimalo, saili manuia i Moapi, ina ua pa’ū le laumeavale i lafanua o Palesitina. O se faatofalaiga mamao ma le utaga poto a le tamā, i se tuualalo ma le fautua poto a Naomi, e tali atu ai i faafitauli ogaoga, ma lu’itau o le soifuaga.

Peitai, o le silia ma le sefulu tausaga mulimuli ane, na iloa ai e Naomi, ua maoaluma so latou faamoemoe. Auā na to’ia o ia, i puapuaga o le olaga, na te le’i mafaufauina. Na malii lana tane o Elimeleka, ona tuua lea na o ia ma le fanau ia Maalona ma Kilion. E ui ina sa fai avā i la’ua nei, a e pagā, na vave maliliu foi, e muamua le tasi, sosoo ma le isi, e le’i maua se suli o le aiga. Na tuua ai na o Naomi, ma Ruta ma Orepa, o avā a lana fanau.

Talofa ia Naomi, ua lagona le fememea’i, auā o ia le tagata Eperu i totonu o nuu ese, ua malii le tane, amia le fanau, e leai sona tofi, ua lamatia lona saogalemu, faaopoopo mai le mamafa o le avega, i le tausiga mo Ruta ma Orepa.

O tulaga maoaluma faapenei, e talitonu Iutaia, o mala ma puapuaga; ua tauia i le taimi nei, agasala o le tuana’i. E pei ona faamasinoina ai Iopu e ana uo, i ona puapuagā. Na ta’utino lava e Naomi lea tulaga, ina ua taunuu i Peteleema. “*Aua le toe ta’ua a’u o Naomi, a ia ta’ua o Mara (o Oona), auā ua matuā oona mea ua faia ia te a’u, e Le ona le malosi uma lava. Ua faatigaina a’u... ua malaia a’u i le Alii.*”

---

Ui i lea, e lē o se faameo pe fesiligia e Naomi o le alofa o le Atua. A o le faamaoni o ona lagona, ma lona loto tele, e sasa'a atu lona tiga, i lona loto mamā atoatoa. E lē faafoliga mai fafo ma tuu i tua, ae ta'utino atu ona mafatiaga, i lona talitonuga, e leai se isi e mapu i ai, na o lona Atua. O le Alii, e ona le malosi uma lava, e mafai ai ona fai sana faai'uga lelei e talafeagai, ni faai'uga e sa'o ma amiotonu, mo le isi laasaga o le soifuaga.

Ua faalogo Naomi ua asiasi le Atua i lona nuu o Isaraelu, ma ua foa'i le tamaoaiiga o taumafa. O le amataga lea o auala saunia e le Atua, e lavea'i ai sitiseni o lona nuu filifilia, o feagai ma faafitauli o le olaga.

*“Ua tu i luga o ia..Ona alu ese ai lea o ia i le mea sa i ai, o ia ma avā a ana tama e toalua faatasi ma ia; ua latou ui i le ala e foi mai ai i le nuu o Iuta.”*

O le Atua na te faaosofia moegaluaga, na te faamaite ma faatupu manatu, ae galulue faatasi ma le utaga poto, le mafaufau e atamai ma sagatonu, o le tagata ola faalagolago i le Atua. Na vave ona mautonu Naomi i lana filifiliga sa fai; sa faigofie ona fai lana faai'uga. Auā sa fesoota'i pea ma lona Atua, sa tumau lona talitonuga i lona Atua, o le Atua e moni lona alofa, le Atua e tumau ana folafolaga.

O mea e tutupu, i le solo lelei po o le faigata, o loo lololotoi ai ma le Atua, na te saunia le auala e sao mai ai, na te galue ma liliu mala, e ave ma ala manuia, mo lana tagata faatuatua. Pe a tapuni mai le tasi faitoto'a, e tatala mai e le Atua le isi pa. Na lagona e Naomi o le faasinoga lea mai le Atua, ia tula'i ese mai Moapi, ae toe foi i Iuta. E faagasolo le tala, i taumavaega a i latou nei; i luga o le ala toe foi, ma iloa ai nisi o folafolaga lelei, ma faai'uga mananaia. E lē gata ia Naomi, a o Orepa foi. E toatele nisi latou te ta'u leagaina Orepa, faapea e lē moni lona alofa, e faafoliga lana sogi atu, e leai se tofo o ona loimata na maligi. Peitai o se tu'uaiga lē amiotonu lea mo Orepa. Auā o le fafine sa usita'i, e ui i sona mana'o e mulimuli, a o lona fa'aaloaloga o le fautua faatina lelei, na faavae ai lana faai'uga e nofo pea i lona aiga. E pei o le talavou Katara, na uluitinoina e Lekeono, na mana'o e fia mulimuli ia Iesu. *“A o Iesu ua lē mafai, a ua fetalai atu ia te ia, “Alu atu ia i lou fale, i lou aiga..”*

Mata sa maoaluma foi Orepa, i lona mau paolo mai i le aiga Iutaia nei. Peitai na sauni lava, e tauave ma tausoa faatasi ma Naomi ma Ruta, le mamafa o le avega. E fa'aaloaloga e le Atua le faai'uga lelei sa fai e Orepa; ua faaitiiti ifo lona tāua, ina ia faamaupu'epu'e ai Ruta, a o i la'ua lava e tasi.

Fai mai le folafolaga lauiloa a Ruta ia Naomi, *“O le mea e te alu i ai, ou te alu ai foi; o le mea e te nofo ai, ou te nofo ai, e fai lou nuu mo'u nuu; e fai lou Atua mo'u Atua; o le mea e te oti ai ou te oti ai, e tanu ai foi a'u...”* Folafolaga o le alofa moni. Ua faaositulaga manaoga o le Ruta talavou, ona o lona alofa; ua faasatauro ona sootaga faalenuu, faaleituaiga, faaletapuaiga, o lona lava foi ola ua na lē manumanu ai, a ua ofo atu mo le manuia o le isi tagata.

Na tupu mai totonu o le maoaluma o le aiga Peteleema, le fa'aauauina o le gafa, na tupuga mai ai le tupu o Tavita, aemaise le Tupu o tupu. Ina ua mamanu faatasi e le Atua, tiga o le tagata faatuatua, tuu i ai le lototele, le usita'i ma le alofa o tagata faatauvaa, faapea foi tulafono i tofi ma aiaiga o suli ma feoi o aiga, faaopoopo tu ma aga tau le seleselega, ua mau ai se lalaga matagofie, se iniini faalesoifua memea, ua sāo faalalelei. Ua suia le maoaluma i le olioli. Ua oo i ona aso na fanaua ai e Ruta le tama o Opeta mai ia Poasa, ona sapaia lea i lima o Naomi, ua fusi i lona fatafata, ua lagona lona mafanafana ma lona fiafia, ua laulelei lona masiasi; ua lē o le maoaluma, a ua saomaluma i le saofaiga faatamalii.

*Ua tu i luga o ia..ona alu ese ai lea o ia mai le mea sa i ai, o ia ma avā a ana tama e toalua faatasi ma ia; ua latou ui i le ala e foi mai ai i le nuu o Iuta.*

O le tu i luga, ma alu ese mai le mea sa i ai, a tuutuu i le loloto, o le gagana faasino i le tu'ua o mea tuai, mea ua leaga, mea ua sesē, ae fai suiga fou; o le gagana o le toe foi, toe fuata'iina, o le toe timata ma fai masae o le upega. E faatatau i le soia le nofoa'i ma vaavaai i faafitauli, lafoa'i le fefe ma popole, a ia o atu pea i lumā, faasaga a'e mata i mauga, e oo mai ai le fesoasoani; tausiniō ma tepa taula'i i le Alii o Iesu, e tini ai faamoemoe.

---

I le ma lenei, e faigofie pe a tutū faatasi i luga, e savalia faatasi le ala e ui ai. O ia ma ana tama e toalua faatasi ma ia. Sa le'i fetuu e Naomi le pogisa o lona maoaluma, sa le'i solomuli foi le alofa faamaoni o Ruta, na la'ua tutu faatasi le lamepa, ma 'u'u faatasi le sulu o lo la'ua faamoemoe, na malamalama ai le ala, a o la'ua folau atu, lo la'ua sã seelua.

Le atunuu pele Samoa, ma le Ekalesia pele a Iesu Keriso. Ua faamalo malaga manuia, ua aulia le Kerisimasi o lenei tausaga, ma ua aga atu i lena tausaga fou. O le vaitau o folafolaga ma faai'uga fai. I le soifua sailimalo, mo le manuia o aiga, le atunuu ma le galuega paia a le Atua. E pei foi ona sa fai i le amataga o lenei tausaga ua i'u.

Pe afai ua maoaluma nisi faatatauga, ua lē taunuu nisi folafolaga sa fai, ua fai ma avega mamafa, ua lama le faavaivai ma tau solomuli. Ua faamanatu mai le feau o le Tala Lelei, e mafai e le Atua i lona alofa tunoa tele, ona liliu lena lagona, e faavae, ma ia tupu a'e ai se isi faamoemoe fou. Ina ua moni le salamō, ma le faatuatua i le Alii le Atua.

Soia le saga nofoa'i i faiga faatupumala, o fa'aaoga ai lou tagata e le tiapolo, e fai mana auupega. 'Aua le faavaivai ma liliu atu i auala faasolitulafono, ma faiga faapaupau, e fofō ai faafitauli. A ia faalagolago ma faatalitali i le Atua, na te faasino mai auala lelei, e taunuu ai i le faaeaina. Pe e te manatu foi ua siliga tali i seu sou faamoemoe, o loo Ia silafia ma galue, i le taimi tonu e talafeagai mo oe ma a'u.

Sa le'i i ai se taimi na lagona ai e Iesu ua maoaluma sana upu poo sana gaioiga na fai. Auā sa lima ta'ita'iina ana faiga filifiliga ma faai'uga fai, i lona fai mea faalogo ma usita'i, i le finagalo paia o Lona Tama. E ui lava ina mamafatū le faatinoga o le faaolataga na auina mai ai o Ia, a e na Ia talia ma le loto maulalo, o le alofa ina ia suia lo tatou leaga e ave ma lelei. Na maliu tiga o Ia i luga o le satauro, a e na toe tu manumalo mai le oti ma le tuugamau. Ina ia faaolaina, faamagaloina a tatou agasala. E lē maoaluma soo se tasi, e faatuatua faamaoni ia te Ia. Ia tumau le viiga i lona suafa e faavavau. Amene.

### F. Sulu

---

## **FEAU O LE KERISIMASI**

*“24 Ua ala Iosefa, sa moe, ona faia lea e ia e pei ona fai mai ai ia te ia le agelu a le Alii; ua na au mai lana avā.” Mataio 1.*

E te saili le Tusi Paia e lē maua se upu e tasi na tautala ai le tamā faalelalogagi o Iesu, o Iosefa. Peitai e lē mafai ona suia o ia i le tala o le Kerisimasi ma le fanau mai o Iesu. E mafua lena, ona sa fa'aaogā e le Atua ia Iosefa e puipui ma faasao le soifua o le Faaola. O le ulua'i lesona lea mo tatou: O lo tatou tiute e puipui ma faasao fuafuaga ma folafolaga a le Atua e le'i fananau mai i o tatou olaga. O le taimi nei, o loo i ai se vaega o le finagalo o le Atua e le'i iloga ona tino mai i o tatou olaga, tatou te le'i olaina. O se folafolaga e fia faataunuu. O se Upu e le'i tino mai. O se galuega ma se misiona e le'i faia. O se tasi o le aiga e fia faaolaina ma lavea'iina mai. O fuafuaga paia nei e le'i atoatoa lona tino mai ma e le'i fanaua mai, ma e tataua ona vaai lelei, e puipui ma faasao, ina ia mafai ona taunuu e tusa ma le finagalo paia o le Atua.

E pei ona sa taumafai malosi Herota ina ia fasiotia tama tane Eperu uma i lalo o le lua tausaga, ina ia oti faatasi ai ma Iesu ua fanau mai, e faapena foi ona taumafai Satani e fai mea uma na te mafai ma iloa, ina ia taofia fuafuaga a le Atua ua fai mo lou soifua ma le ola o i latou e pele ia te oe. E aogā lea e te malamalama ai, o le taua o loo faia nei, e lē faasino i lou taimi ua tuanai poo le taimi nei, a e o le taua faasino i lou lumana'i. O le a se mea e tataua ona tatou faia? **Muamua**, ia nofo sauni, ia faautauta. Ia mataala i taimi uma. *“8 Ia outou faautauta, ia outou mataala, ona o le ua fai outou mona fili, o le tiapolo lea, o loo fealualua'i o ia e pei o se leona tagi, ua saili se tasi e aina e ia.” 1 Peteru 5.*

Ma **lona lua**, ia malosi le tatalo. Ufiufi oe, lou olaga ma e pele ia te oe, i le tatalo i taimi uma. *“30 Na ou saili ia te i latou se tagata na te atiaaina le pa, ma tu i le mea ua lepetia i o'u luma mo le nuu, ina ia ou le faaumatia ai; a e ou te le'i maua lava.”* Na saili e le Atua se tagata, na Ia maua Iosefa. E mafai ona e tali atu i le saili mai o le Atua mo nisi, i lenei augatupulaga?

---

**“19 O Iosefa foi...ua ia manatu e faate’a lemu ia te ia.” Mataio 1.**

O le soifuaga o faatinoga lē leoa a Iosefa, o i ai ni **ki** mo le ola i totonu o folafolaga a le Atua. O le ki muamua, **o le alofa**. Tatou te feiloai atu ia Iosefa, a o i ai o ia i le ogatotonu o faafitauli ogaoga. O loo fai le la’ua faigauō ma Maria. Ma e talitonu foi o ia, e alofa Maria ia te ia...seia oo ina faate’ia ma ia iloa, o loo ma’itaga Maria. O le a sana tali talafeagai? Faailoa ma faamatagā ia te ia? Molia i le tulafono a Mose ina ia fetogia i maa? E leai, a e na ia filifili i le alofa ma faamagalō, a e lē o le inoino, ita pe tui ma sui.

O le alofa o Iosefa na faasaoina ai le ola o Maria ma puipui le tama a fanau mai, ina ia taunuu Lona faamoemoe e faaola le lalolagi. Ma avea ai lenei tamā kamuta malamalama, loto faamagalō ma alofa, e faafaiilele ma tausi se Atalii malamalama, faamagalō ma alofa. Se Atalii o le a fetaia’i ma le ita ma le inoino o le lalolagi; o le a tupu a’e ma na faasili le alofa nai se isi lava mea; e lē o le faailoga tagata o tu ma aga faa Iutaia, a o le agalelei i le fili Samaria ia tutusa, ma faasa’oloto le ‘fafine i le vai’eli’ mai se olaga toilalo ma le gaogao, ma aumai se faamoemoe ola i le aai atoā; na te fai atu i le fafine na molia mai i le faitaaga, “11 Ou te lē faasala foi ia te oe; alu ia oe, ‘aua e te toe agasala.” Ioa.8. Se Atalii na te vaai i le tagata agasala, ua lē leaga, a e ua leiloa.

O se tasi atalii o Iosefa, o Iakopo, e i ai le aso e talitonu ai ia Iesu ma na tusia ai se tasi Tusi o le Tusi Paia ma na faapea, “17 A o le poto mai lugā e muamua ona mama, i le ua filemu, e agamalū, e ganagofie, e tumu i le alofa, ma fua lelei, e le alofa faapito, e le faatagā fai.” Iakopo 3.

Ua i ai se tagata ua na faamanu’alia oe? A o ai ua na faalataina oe, pelogia ma faaseseina oe? A o le a lau tali, le fuafuaga ua e sauni e tui ai ma sui? Mulimuli i le faataitaiga a Iosefa ma faailoa le alofa. Ma e lavea’iina ai o oe lava, faapea le isi uso a tagata, faasaoina mai le leaga ma le faaumatia. O se mea faigata tele le ola faamagalō, ma le tali atu o le leaga i le lelei. A e o le ala lea i malo, e faaeaina ai oe, ma fai ai oe ma viiga o le Atua.

O le ki lona lua, o le **faatuatua**. “A o manatunatu o ia i na mea, faauta, ua fa’aali mai ia te ia le agelu a le Alii i le miti, ua faapea mai, “Iosefa e, le atalii o Tavita, aua e te fefe ina au mai ia te oe o Maria lau avā, auā o lana to mai le Agaga Paia lea.”

Na manatu Iosefa e faate’a lemu ia Maria. Ona ta’u mai lea e le Atua ia Iosefa o le fuafuaga paia. O le a le vaega a Iosefa e fai? Ia faatuatua, ma talitonu i le faasologa lavelave o mea o le a tutupu. Ina ia talitonu i le Atua, e ui ina lē malamalama i mea ua tutupu, pe faamatalaina. E 4 ni mea na faasino e le Atua ia Iosefa:

i. Na faamanatu e le Atua lona faasinomaga: ‘Iosefa, le atalii o Tavita.’ O lo tatou faasinomaga, o atalii ma afafine o le Atua, ‘ia Iesu Keriso’ (Efeso 1:18-19).

ii. Na faamanatu e le Atua ia Iosefa, e ‘aua le fefe. E te’a le fefe ina ua faalogo i le Atua, i afioga paia a le Atua. “E faalogo foi o outou taliga i le upu...” Isaia 30:21.

iii. Na tuu ia Iosefa faatonuga i mea e fai. Ina ia ave Maria e fai mana avā, ia tausi i le tama, faaigoa ia Iesu. Ia tatou usitai ma mulimuli i faatonuga a le Atua. O le faatuatua ma le usitai e taunuu ai i manuia fuafuaina mo oe.

iv. O loo i ai faatasi o Ia i soo se mea na te faia.

**“24 Ona faia lea e ia e pei ona fai mai ai ia te ia o le agelu a le Alii...”**

O le ki lona tolu **o le usitai**. Na usitai Iosefa i le Atua, a o lē fetui le tulaga o mea e tutupu mai, i le mafaufau; ina ua fesiligia, ma lu’itauina o ia i le faaluafesasi, ma fesoua’iina ai. Na usita’i e ui ina tuu ai lona aiga a e alu i Aikupito se’ia oti Herota. O le tuu lava lea o lana atina’e, pisinisi, o uo ma e masani ai. E le’i iloa pe fia le umi e toesea ai, e le’i iloa tautala le gagana a tagata ese. Ui i lea, na alu lava i Aikupito le nofoaga o le usita’i. O folafolaga a le Atua mo i tatou e puipuia ma faataunuuina, i nofoaga o le usitai. E faailoa lona finagalo, e fai vavega, ma tatou saogalemu, i nofoaga o le usitai.

O e faatali mo le faataunuuina o se folafolaga? O e faatali i se tali o au talosaga? Fa’aaoga ki e tolu: **alofa, faatuatua, usitai**. I lenei Kerisimasi ma aso uma. Ia manuia le Kerisimasi & 2025 fou.

**F. Tolua**

---

## **FEAU O LE ASO**

Aso Sa

### **O le a le mea e ta'u o se atua ese?**

Tusi Faitau: Teuteronomie 4: 6 – 20.

O se atua ese, e faasino i soo se tupua ua ta, po o se aitu, se tagata, pe soo se mea faitino, na te sui tulaga i le Atua i le olaga o le tagata. Soo se mea ua pele, ua faamuamua ma faasilisili i le loto o le tagata, ua faamoemoe ma faalagolago i ai, a e faatulaga lua ai le Atua, i taualumaga o lona olaga. E aofia ai ana tu ma agaifanua, o ana talatu'u ma ana tala o le vavau, o ana measina ma ona tamaoauga. E aofia ai foi le pule ma le mamalu i pulega o faiganuu ma faiga malo, o le 'oa ma le tamaoauga, aemaise o faiga amiolētonu ma le pi'opi'o ina ia maua mai ai ia mea.

Mo Isaraelu, e anoanoa'i atua ma tupua faapaupau sa tapuai ai nuu na si'omia i latou. A e na latou faia foi le tupua auro e ifo ma tapua'i i ai, e pei ona sa faia e isi nuu. O nei tupua faapaupau ma atua ese uma, o mea e leai ni ola o i ai. Ua na o le Alii le Atua, o le Atua moni e tasi, le Atua soifua e faavavau; o Ia le alofa ma le faamaoni, le Atua Faaola.

Ua manino le Atua o le au Kerisiano, o Iesu Keriso na liutino ma afio mai ai le Atua i le lalolagi, na maliu ma toetu e faaola le lalolagi agasala. O le Atua lea o le EFKS, Iesu Keriso o le Ao o le Ekalesia. A ua manaia foi le faamanatu mai o lenei fesili – o le a le mea e ta'u o le atua ese? Tatou toe iloilo toto'a ifo, po o tatou tapua'i tonu i le Atua moni, po o nisi atua ese? Pe na ona ta'u i le upu ma talitonuga faalemafaufauga, a o tatou soli faaleiloga pea uluai tulafono e 3 (Esoto 20:3-7)? Ina ua aumai le suafa o le Atua moni, tau ina fai ma ufiufi, fai ma faanoi, fai ma pasese, o le atua o tu'inanauga ma ifoga tupua o tatou faia i aso uma?

A e a lau aganuu sa tataua ona fai ma auauna a le Tala Lelei, a e foliga mai ua toe faapaupau ai le Tala Lelei, ona o le fia faamalieina o lau tu ma lau aganuu, ma lona fa'aaogaina ua amo ai le

mamafa e le toatele, ona o le tuinanau o le toatasi pe toalua? A o pulega i faigamalo a Samoa i nei aso, le atunuu ma le malo o loo faavae i le Atua moni? Ua maitauina lava pei ua tausolomua i ta'ita'i o le atunuu le lē matata'u, lē fefefe i le Atua moni, ona ua atua i le pule, le paoa ma le mamalu; ua sili atu le alofa i sootaga faaletagata, nai lo le alofa i le Atua ma le atunuu. O se feau e toe fafagu mai, ne'i o tatou faatamala ma momoe pea, a o faatuputeleina atua ese i lo tatou faasinomaga ma o tatou olaga.

Aso Gafua

### **Toe faufau sootaga o le feagaiga: atua ese i le Feagaiga Tuai.**

Tusi Faitau: Ieremia 19: 1 -11. “4 *Auā ua latou tu'ua a'u, ua latou liua foi lenei mea, ma ua latou faamu ai mea manogi i atua ese na latou le iloa, o i latou, po o latou tamā, po o tupu o Iuta; ma ua latou faatumuina lenei mea i le toto o e le sala.*”

O le ifo i tupua o Isaraelu, lo latou lafoa'i o le Atua na latou osi feagaiga, a e mulimuli atu ia Paala ma isi atua faapaupau, na tupu ai le to'asa o le Atua, ma tauia i le Tafeaga. E lē o se mea faafuase'i lenei, a o le mala lava ua leva ona lapataia ai Isaraelu, o le i'uga lea e oo i ai pe afai e lē tuua le ifo i tupua. Lea la ua selesele le tau i le agasala na lūlū, po o latou auga tamā na aia le vine moto a e magiagia ai o latou nifo, po o latou lava, o le mea lava e tasi: a ifo i tupua, e nofo sala i le faamasinoga amiotonu a le Atua. O le feau mo Isaraelu, ia toe faufau sootaga o le feagaiga. Ia salamō faamaoni, a e lē na o le nofo i le lefulefu ma ofu le ie talatala.

O se feau faamanatu mai mo i tatou foi, ina ia a'oa'oina ai i tatou mai mala na oo i ai le nuu o le Atua. Ua uma ona tatou osi feagaiga ma Keriso le Ao o le Ekalesia, ua folafola lo tatou faamaoni e mulimuli ia te Ia ma fai lona finagalo. Peitai o loo tatou faia pea le agasala, e ifo i atua ese ma tupua faapaupau o le tuinanau ma amio matavale. Pe afai tatou te lē salamō faamaoni, e toe faufau sootaga o le feagaiga ma Keriso, o le i'uga foi lea tatou te oo i ai e pei o le tafeaga a Isaraelu. Ua uma ona totogi e Iesu a tatou agasala uma, e



---

ala i lona maliu i le satauro. Pau la tatou mea e fai o le talia i le salamo ma le faatuatua, ona leai lea o se mea tatou te fefefe ma atuatuvaile ai. Ia manuia ona o Iesu.

Aso Lua

**Liliu i le Atua soifua: atua ese i le Feagaiga Fou.**

Tusi Faitau: Galuega 14: 8 – 18.

O Lusa na faia ai e Paulo ma Panapa le vavega i le suafa o Iesu, na faamaloloina ai le tagata pipili talu ona fanau mai. Na ofo le motu o tagata, na latou manatu o Paulo ma Panapa o ni atua, ma faaigoa Paulo ia Hereme, a o Panapa ia Seu, ma ua latou aumai manu e osi ai taulaga mo i la'ua. Na vavao e le au aposetolo ma ta'utino, o i la'ua o tagata e pei foi o latou, a o le Atua moni o Iesu Keriso, o Ia e ona le mana na faia ai le vavega. O le feau mo le motu o tagata, ia iloa le mana o Iesu Keriso, e sili atu nai lo latou atua faapaupau sa tapuai muamua i ai. Ia talitonu ma faatuatua ia Iesu, lea ua maloloina ai le pipili ua leva ona latou fesaga'i; ia osi foi taulaga o le faafetai ia Iesu, a e 'aia le osia i tagata.

O le ituaiga atua ese lea ua taatele – o tagata latou te faia galuega ofoofogia i le suafa o Keriso, ona latou faoa lea o le viiga ma le mamalu e tatau mo le Atua, ina ua si'i i luga e isi tagata. O se feau faamanatu mai, ina ia tatou faamalolosi ma faamaoni i tiute ua valaauina ai, e pei o Paulo ma Panapa. A e a uma ona tatou faia o se mea, ia tuu pea le viiga i le Atua, a e 'aia lava ne'i ia te i tatou. Auā o le fili taatele, lo tatou seetia i upu ma le faaviivii o tagata, aemaise o lo tatou fiafia e talia osiga taulaga e aumai e nai tagata mo i tatou, peisea'i o tatou e ona le mana ua faia ai vavega ma galuega tetele, peitai o le Atua na mafai ai.

Pe afai foi o lena o faapipiliina oe e le fili ma ana 'au, ia e talitonu ma faatuatua i le Atua soifua o Iesu Keriso le Alii Faaola, ona faaolaina ai lea o i tatou. Ma lenei, ia fai i tatou ma meafaigaluega a le Atua, e faamalolo ai nisi o loo faataotolia pea i le malosi o le agasala, a e soia le tausolomua e faapipili isi uso, i upu ma tala e faamasinoina ai.

Aso Lulu

**Se faataitaiga fou (faaonaponei): o tagata ta'uta'ua.**

Tusi Faitau: 1 Korinito 1:18 - 31

E oo mai i aso o le au aposetolo, ma le talaiga o le Tala Lelei ia Iesu Keriso, ua mata felefele foliga o atua ese, sa tapuai fefiloi ai le au kerisiano Iutaia, Eleni ma Roma. Ua lē gata i atua o talatuu, a ua oo lava foi i tagata, ua faalagilagi o atua, ua faaeaea, fa'aaloaloga ma faalupe i mamalu, e ou le Atua.

E le taumate sa i ai Paulo i taaloga o Isimana i le tausaga 51, a o nofo ai i Korinito. E le'i alu le aposetolo, ina ia faamamalu le atua Eleni o le sami ia Posaitonu, a o se avanoa lelei ia faalauiloa atu ai i le lalolagi sa tumutumu ai, lana tala'iga – o Iesu le Keriso na faasatauroina.

Na teena e le toatele le talaiga ia Iesu, ona o le satauro; e lē amanaia a e na ulagia, ma fesiligia. O le manatu lautele, o se mea valea, se Atua e maliu fasia; se Faaola e toilalo faasatauroina; o se mea ula i le potu o le tagata. Na inosia faatasi ai ma le au tala'i, le au misionare a Keriso.

Sa sili ona amana'iaina e le lalolagi, le vasega o tagata lauiloa ma ta'uta'ua, na faamamalu e pei o ni atua; tagata popoto, tagata talenia, tagata ua ausia matati'a ofoofogia, o matuaofaiva i taaloga, musika, taleni ma faafiafiaga, tainane upufai o malo. O faataitaiga o atua ese i na ona po, ma e oo mai nei foi.

Peitai sa le'i faavaivai ai le aposetolo, i lana talaiga o le Keriso faasatauroina, ma le leo faaperofeta. E ui ina taufaifai mai le lalolagi faapaupau, a o le mitamitaga lea o Paulo – o le satauro o Keriso. O le mau a le aposetolo, e pei ona faailoa i le Tusi ia Koriniro, *o le satauro*, o le fua lea e iloa ai le tapuaiga moni, i le Atua moni, i soo se kerisiano, soo se Ekalesia. Fai mai a ia, *“O le mataupu i le satauro, o le valea lea i e o malaia; a o le mana o le Atua ia te i tatou o loo faaolaina.”*

***(faauma itulau 12)***

---

# ***O LE PEROFETA MULIMULI***

*(O le Tala Faafagogo ua FaaSamoaina mai le Tusi, "The Last Oracle", tusia e James Rollins)*

“Alu i tua,” na fai atu ai Monike, a o ia faasino atu i le fale piliki. “Alu lēmū. Agai i le fale teu oloa.”

E ui i le tele o faamalama, a e o se nofoaga malosi lelei e malu puipuia ai. Atonu latou te maua ai foi ni mea talafeagai mo le puipuiga o i latou, o i luga o fata o i ai. Na tulei atu e Monike ia Piota i lona autafa. Na gatete le tama i ona lalo ifo. A o latou pipii vavalalata, na latou solomuli atu i le ala na latou asaina mai i totonu o le vao.

Na fai lava ma tepa Monike i tua, e tele lava ona sa faapena foi ona fai e Piota. Na ia talitonuina le atamai o le tama. O le mea sa pi’o ai le auala agai i le nofoaga o eliga maina, na aliali a’e ai le fale teu’oa i le isi itu o le vai. Na iloa e Monike o taika latou te sailia nofoaga maualuluga: o se papa maualuga, o se lālā laau e falala, o ni vaega o atumauga, nofoaga latou te mafai ona osofa’i ifo ai i a latou vete.

Na pei ua ia mateia ua iloa atu o ia, ona sosolo atu lea o se ataata lanu tusitusi e pei o le tafe o le suaau, mai se tasi o faamalama i le fogafale i luga autafa i tua o le fale. Pe ana lē mataala Monike, mata na te misia lea gaioiga. Na mou atu le taika i totonu o le vao uumi.

“Tamo’e,” na nanati atu ai Monike ia Konesetatio ma Kisika.

Na afisi atu e Monike ia Piota i ona lima i lana tago atu e tasi.

Na taufetuli saosaoa atu tamaiti e toalua i ona luma, ua tuia i le fefe ma faamalasia e le fia sao. Na mulimuli atu ai Monike, faapea Marata na momo’e atu i ona autafa.

O tua mai o Monike, na lagona ai le leo pa’ō leo tele o le ta’e o laupapa a o oso atu se mea mamafa mai le uilivai agai atu i le isi itu o le vai. Na matala mai le faitoto’a o le fale teu oloa, na o le tolusefulu iata le mamao ese. O le a tapunia. Na ia tatalo mo se pusa fulisa lapo’a, o se mea e mafai ona latou lalafi ai.

O le pa mai o se fana na ulufia totonu o lona fefe. Na tatagi ma pefu autafa o ona tamatama’i vae i le tau ai o le pulufana.

Na puna atu Monike i le itu, ma taavale atu i totonu o le vao uumi, a o ia afisi ma faamaopo Piota ia te ia. Na taavale pea seia oo ina tau atu i le itu i tua o se tasi o loli tuai ua elea.

O le tagata fanafana na ia fana mai i le afa pito i lalo o le auala.

Atonu o se tasi o fitafita Rusia.

Na liliu atu Monike, ma iloa atu Konesetatio ma Kisika o feosofi atu pei o ni aila ua fefefe, i le isi itu o le auala ma ui atu i le faitotoa o le fale teu oloa. Na mulimuli atu ai Marata i lana puna e tasi. Na ta’ei nuti nini’i le tasi faamalama a o pa mai le fana. Peitai o le taimi lea ua saogalemu i totonu le toatolu.

Na lafi lilo Monike i tua o le loli a o ia punou ai i lalo. E lē mafai ona ia oo i le fale teu oloa aunoa ma lona kolosi atu i le taalaelae.

Na ia tepa atu i le auala.

Ua leai se faailoga o se taika. Leai ma sina vao e gāsē. Leai se pefu ona o ni vae mamafa.

O le pa o le fana atonu na faapa’ū maualalo ai Sakara, na fefe ai le manu e pei o le fefefe o i latou. Sa taatia lafi lilo ai iina.

Na tolotoalo atu Monike, ua maileia i le va o le taika ma le tagata fanafana. A e lē na o le pau lena o mea mata’utia o lamatia ai i latou. O se isi faafitauli tele o loo faamalumalu ifo ia i latou. O tua atu o le pito o le aai, na susulu manaia mai ai le Vai o Karakei, o loo iila mai ai i fafo ma lona kasa oona mata’utia. E oo lava i le tu atu iinei, o le oti lava.

12.30 taeao  
Uosigitone.

A o tatagi pea le faailoilo eletise, sa tu Iuri i tafatafa o le moega o Sasa, o loo pupuni o ia i lona tino mai ia Makepalai. Na pulupulu le teineitiiti i lona ieafu, o ona lima o pupuni ai ona taliga, mai le leo o le logo faailoilo ma le fe’ei o tagata. I le isi itu o le moega, na savali atu ai Kati Pariani ia Sasa, e faamafanafana lona alofilima i luga o lona ulu. O tua ane o le fafine sa tutū ai Malakoma Teni ma se leoleo.

Na faasaga atu Iuri ia Makepalai. O le tamaloa sa punou ma tau totolo ese, o lona tua na u i le tulimanu o le potu, o lona lima na milo i le lauulu enaena o lana malo faapagota, o Fomai Lisa Kumini. Na tuu atu lana fana telefoni i lona ua.



---

Ua i ai i latou i se tulaga lē mautonu.

A o le taimi lea o loo faananati ifo Mapeletope i lalo ma ana fitafita. Na mu le toto o Iuri i lona mafaufau atu i lona tagata leaga o lago ona lima suau'ua ia Sasa. Na te lē tuua lona mea ia taunuu. Na liliu atu Iuri i le laulau uamea o meafaigaluega ma piki mai se tui mai le tele o tui sa fa'aaoga e togafiti ai Sasa.

“Iuri!” na ‘e’ē atu ai Makepalai aunoa ma se lapataiga.

Na ia tali mai faaRusia, ma le mautinoa e malamalama ai Makepalai. “Ou te le tuua oe e te tago pe ave ia Sasa,” na ia fai atu ai ma tui atu i le uaua o le lima o le teine.

A o ia oomi atu le tui, na ia iloa atu le suia o le fana a Makepalai, aveese mai lana malo faapagota ae faasaga atu ia te ia. O le tui sa na o se vai masima na i ai, na o se mea tau faasesē. Na liliu taamilo Iuri ma lele sa’o atu i le tamaloa. O le taimi lava foi lea e tasi, na tu ai le mulivae o le seevae o Lisa i le lautele o le alofivae o le tamaloa, ma taia atu lona muliulu i ona foliga.

Na pa le fana, pasae i totonu o le potu pumoomoo. Na lavea Iuri i lona tau’au, ma taavili sitepu ese. Na ia tau lē lagona le tiga, a o ia taia atu ia Makepalai, ma mamulu ese ai Lisa mai ona lima. Na aapa atu Iuri i le fa’a’ī o Makepalai ma tui atu le isi tui lona lua na ia aumaia mai le laulau o meafaigaluega, ma oomi atu i lona fa’a’ī. O le tui sa i ai vailaau e le’i suia o togafitiga o Sasa. O lona malosi atoatoa e tuufaatasia ai vailaau oona, vailaau malolosi, vailaau faagase ma le ogaoga. A o tauivi ma lavelave i la’ua, na tafana faauma atu e Makepalai lana fana i le manava o Iuri. O le pipi’i o le fana i lona tino, sa pei ai le pa o le fana, o se tagata o tatu’i o ia i lona manava. Ae ui i lea, sa tulei atu pea e Iuri le tui i lona nofoaga, o avatu ai le vailaau oona tuu sa’o i lona fatu.

Na faataiō Makepalai.

Na pa’u’ū faatasi Iuri ma le tamaloa i lalo i le fola. Na ia iloa lelei le lagona ua oo i ai Makepalai: o le aasa o le afi o sosolo i musele o lona tino, o le fufusi taavili i lona ulu, o le matuitui o lona fatu i le tiga. O lima na latou toso ese Iuri mai ia Makepalai ma tulei atu o ia i le fola. Na ia iloa atu Kati o ufiufi ia Sasa, ma puipua o ia mai le pa ma salalau o pulufana, o liliu faasaga ese mai ai foliga o le teine.

O lona itu, na taavili mimigi solo ai Makepalai i le tiga matuitui o le tagata ua lavea ma ua gase, o ona fāua ua salalau solo, ua lavatoto uma a o ia ‘a’ati lona laulaufaiva. Atonu o le a ola pea le tino, a o lona mafaufau ua oti. O le a susunu e le vailaau lona fai’ai, ona tuua ai lea na o lona atigipoo ua leai se mea o i ai.

Na punou ifo Lisa ia Iuri. “Fesoasoani mai ia te a’u!”

Na pa’i atu isi lima ma pamu i lona manava. Ua tafe solo le toto. Na tago atu Kati ua maopo mai lona ulu. Na tale o ia. Na faatetele le lavatoto. Na aapa atu lona lima, na iloa o le a fesoasoani atu le tamaitai.

“Sasa...” na ia tau manavanava atu ai.

“O le a matou puipua lelei o ia,” na fai atu ai Kati.

Na lulu le ulu o Makepalai. Ua uma ona ia iloa le mea lea, na te le’i masalomia i lona loto. “E toatele atu... e tele atu isi *repionoka*.”

Ua faalētonu ma ua lē sagatonu – lona mafaufau ma lana vaai. Na faasolo ina pogisa lona lalolagi, ma ua goto ifo le tiga ua ave ma tulaga maluluina. Na ia taumafai e tautala atu, e fia ta’u atu ia Lisa poo fea. “Kela...nisiki...” Na ia taumafai e osiosi luga o le fola, tusi ni fuainumera se lua i le toto o lona manu’a: 88.

Na pipii mau lima o Lisa e faamaopo ai lima o Iuri. “Faamalosi mai, Iuri.”

Na naunau faamoemoe o ia maimau e, pe ana ia mafai, mo Sasa, mo i latou uma.

Na ufiufi ifo le pogisa; ua faasolo ina mou atu leo i totonu o le ana umi. Na ia ofo atu le mea e tasi o totoe faatasi ma lana toe mānava.

O le faamoemoe.

Na ia oomi mau le lima o Kati ma feula faamalosi atu lana feau mulimuli.

“O loo ola o ia...”

Na te’i Kati, ua nofo ifo i lalo ma le ulu o Iuri i luga o ona vae. Pe na sa’o lana faalogo? Na ia pulato’a ifo i totonu o ona mata pupula, ua leai se ola ma ua pei o ni tioata. Sa fememea’i o ia i taimi mulimuli, peiseai o tau saili se mapusaga faai’u, na oo lava ina tautala faaRusia. Sa manino ai le talanoa faaRusia a Kati i aso ua te’a a o i ai i Ofisa o le Neivi, ma sa tau malamalama atu ai Kati i nisi o ana tala.

E i ai isi *repionoka*.

E toatele isi tamaiti.

E pei o Sasa.

---

Na ia sisila atu i le teine i luga o le moega, o loo puipuia nei e Malakoma.

Sa tau memumeu atu Iuri ina ua uma lana tala lena, sa taumafai e tusi atu se upu, peitai sa na o se memumemu leai se uiga. A e faapefea lana upu mulimuli lava, a e le'i uma lana manava?

Na liliu atu Kati ia Lisa.

Na tootoli lana uo i le faaputuga o toto o le tino o le tamaloa. "Na ia lavea'iina lo'u ola," na ia memumemu mai ai, ma taatia atu lona lima i le fatafata o Iuri. O le pisi tele o Lisa i le taimi o le vevesi, na ia lē lagona lelei atu ai upu mulimuli a si tamaloa.

O tala atu o Lisa, na taatia mai ai le tino o Makepalai, ua uma lona taavilivili solo. O loo matala ona mata, o loo sisila, a ua leai se ola ma ua pei o se tioata, a o lona fatafata o loo manavanava pea i luga ma lalo.

Na nofo i lalo Kati, ua le mafai ona tu i luga, o lana pupula ua faasaga ia Sasa, i le faaputuga o tusitusiga ata.

O toe upu a Iuri ua na faatumulia lona lalolagi.

O loo ola pea o ia.

Na pipii mau tamatamailima o Iuri i lona lima a o fai lana tala lena.

O se feau sa fuafua mo ia, na o ia.

Na iloa e Kati le tagata o faasino i ai, peita'i o se mea ailoga e moni, e lē mafai ona tupu.

Ui i lea, o ana toe upu ua na tatala faamatagataga se mea sa noatia mau i totonu o ia, na ia toe tosina mai se mea sa le'i liu maalili atoatoa. Na faasolo ina televave lana manavanava. Ua o mai faatasi lana manava, ma se afi ua faasolo ina mumū tele i totonu, ua na susunu ese se masaloga sa i ai, ma faasusulu atu le malamalama i tulimanu pogisa o lona fatu. O se vaega o lona tagata sa naunau e faate'a ese lena pogisa; sa i ai pea se puipuiga i totonu o ataata. Peitai sa ia musu lava e tuliloa nei aloiafi fou.

A o lenei, o le afi lea ua na toe faatu o ia i luga i ona vae.

Na ia tago atu uu mai le fana ua tia i le leoleo mai le fola. Na ia tu faasa'o, ma ia valaau faanatinati atu i le potu. "E lē saogalemu iinei. O le a tatou osofai mo se ulufafo...a leai, tatou te su'ea se nofoaga tatou te malu ai."

A o talai ese e Lisa ia laina o le I.V. a le teine, na iloa atu e Kati le tusi ata, o loo matala pea i luga o le laulau sa i autafa o le moega, sa osiosi ai le

ata i le lanu meamata, o se tamaloa i luga o se vaa laau.

E faigata ona tupu, peitai na iloa e Kati e moni lava.

O Monike...

O loo ola o ia.

10.20 taeao. Atumauga Urale i Saute.

Ua tataua ona oti le Amerika.

Na upuvale Porosakova i le misi o lana fana. Na ia taoto faamafola lelei i ataata o se faleoo o maina. O lana fana sa taatia faasasa'o i ona luma, o lona alafau sa pipii lelei i le auupega.

Na te le'i fuafuaina le faafuase'i ona toe feosofi o ana manu sa tuli – feosofi sa'o mai ia te ia. E mana'omia le toe faatulaga lelei o lona nofoaga, ma toe faasagatonu muamua o lana fana a e le'i faia se isi gaioiga. Aemaise na ia masalomia lana vaaiga na faaleagaina pe ua sipa, talu le faaletonu sa tupu i le lopala. Sa le'i mafai ona toe siaki le amoti poo lelei ma sa'o le meavaai. O le pa o pulufana o le a fai ma lapataiga i ona fili o sailia. Ui i lea, ua mafai ona ia taofia i latou i lalo mai le saga o atu pea.

O tamaiti e toalua ma le manukī sa lalafi i totonu o le fale piliki. O le Amerika ma le tama sa i tua o le loli. Na solomuli i tua Porosakova, faapipii pea i le vao uumi. Na o lona fia kolosi lava i le isi ituala, ona ia toe vaaia lea o le Amerika.

Ma o le taimi lenei, e lē toe misi lana fana.

Na ia tolotolo lemu atu i le auala, faalatalata i lalo o ataata. Na ia taunuu i le isi itu ma totolo atu i tua o se paelo sa mafuli. Na ia faalagolago atu i luma, ua sauni lana fana.

I le isi itu auala, na manino atu nei lana vaai i tua o le loli.

Na tuu atu le limatusi o Porosakova i le amoti o lana fana, ua uu mau, a ua ita ma faalētonu.

E leai se tagata o i ai.

Ua nimo ese le Amerika ma le tama.

O Piota sa faapupuu i totonu o le loli, i le avanoa e tuu ai vae o le avetaavale. Na sii o ia e Monike ma tulei i ai mai le faamalama sa matala faa'afa, ona ia ninimo atu lea i le va o fale sa i tua o le loli. A o le'i alu ese o ia, na ia geno atu ia Piota ina ia nofo ai ma ia punou maualalo ma sōsō mamao i totonu. Na latou faasoaina faatasi ma lau laau ma isi iniseti fetolofi. Na fusi mau ona lima i ona tulivae.

---

O se isi vaipanoa pogisa i lona mafaufau, se nofoaga e fefe e toe tepa i ai, na ia manatua sa ia lafi ai faapenei muamua: vaapiapi tau faaofiofi, tau lē manava, o loo tuliloaina ma sailia. O se isi olaga. E lē o sona. O papa na si'omia o ia i lena taimi, a e lē o uamea elea.

O le faapepepepe ai i le va o le taimi ua tuana'i ma le taimi nei, na lagona ai e Piota le mainiini mai o le malamalama mai totonu o le pouliuli. O fetu emoemo mai le lagi pogisa. Pe afai e umi ona ia pulato'a i ai, o le a faateteleina atili ona latou susulu, ma pa'ū'ū ifo ia te ia. A o le lagi pogisa sa tele ina ia faafefe ia te ia. Ona ia toe faamimigi ese lea, ua toe foi mai i le taimi nei.

A o ia faapea na fai, na faatumulia o ia i se galala. Peitai, e pei foi o le manatuaga talu ai, o lenei galala e lē mo ia, e lē o sona. Sa latalata ane, se tasi fatu na tātā malosi pei se faititili, na foloina le tātā lemū o le fatu o Piota. O le sasala o manogi ese na ia lagonaina: o le mutia susū, o le musumusū o le toto vevela i le ea, o le lagonaina o le tu atu o alofivae i luga o iliili. Na tō malosi se mānava tele, e malosi atu nai lo si ona fatafata itiiti. O le manogi o le tulituliloaga na mumū i totonu o ia.

Na sau faatasi ai ma se isi manogi ese.

O se manogi fou.

O se isi tagata poo se manu tutuli o loo i ai i le siosiomaga.

A o lenei sasala o loo ia aumaia ma puaina mai e sili atu nai lo se manogi o se ma'i.

O le toe manatua ai o tiga tutui na ia aumaia.

O le mainiini mai o le ivitū, na susunu ese ai e le ita le lagona galala sa i ai.

A o faapupuu atili Piota, na faamalumalu atu lena fatu tele, o aga'i atu ia te ia.

O Monike na tiliola ui atu i tua o fale sa tu i le auala, ma agai atu ai i le le isi afa i lalo o le auala.

Na pei e mu lona fatafata ma lona tua, i le maosiosia ma lavelavea i nutiga laupapa o le vaapiapi na ia tau faaofiofi atu ai i le va o fale. Ua uma ona faamautu atu Piota i totonu o le loli, ua saogalemu mai le taika mo le taimi nei – a e le'i sefe mai le tagata fanafana. O lana faamuamua, o le tata'i ese o le fanafana mai tamaiti, ina ia alu atu o ia e tuliloa Monike ma su'e i totonu o le fefiloi ai o fale.

O le saogalemu ma le faasesē ese o le fitafita o le a mulimuli mai ai.

Na tamo'e punou i lalo Monike. Na ia pipii latalata i fale ma alofia faaputuga laulau mamago faapea iliili taatitia solo ai. Na ia tolotolo lemu seia taunuu atu i le itu o pi'o ifo ai i lalo le auala. Na ia taamilo i le fale mulimuli, ona ia toe foi ane lea i le auala tele. Pe mata ua lava le mamao lea?

Na ia to lana manava, a o ia autilo solo atu i le tulimanu ma vaavaai siaki le auala. Na ia iloa atu piliki o le fale teuoloa, o le loli elea, ma le auala o vao ma mutia uumi.

E leai se mea na gāsē. Na agiagi malie le savili mai le mauga ma luelue ai tumutumu o vao.

A e leai se faailoga o le tagata fanafana.

E tatau ona i ai i fafo i o, atonu ua tolotolo atu o ia i tamaiti. E le'i manaomia e Monike se tulaga e ave faapagota ai se isi, pe afai e maua e le fanafana se tamaitiiti. Na faamaopoopo lelei e Monike ona vae i ona lalo. O le a ia tamo'e saosaoa atu ma aga'i atu i le isi itu i lalo o le auala. O le faaputuga iliili o le a maua ai se leo ma pa'o leotele.

A e tatau ona fai lelei ina ia seetia le fanafana ma tata'i ese mai ai mai tamaiti. Na mānava tele i totonu Monike, ona ia oso atu lea i fafo mai le mea sa lafi ai, ma solisoli i luga o iliili. "Tamomo'e!" na ia tauvalaau atu ai ma talotalo atu ona lima i le isi itu e peisea'i o loo i ai tamaiti. "Tamomo'e pea!"

Ia faapea ai le tagata fanafana, o loo i ai tamaiti ma – *Pa!*

Na te'i Monike i le pa o le pulufana ma lavea ai lona ogavae. Na pei e mamulu ese lona vae agavale mai ona lalo.

Na ia pa'ū pasasa i lalo, o ona lima na aapa atu e tau talitali ai lona mamafa. Na saei e iliili le pa'u ma aano o ona alofilima, ona tapulima na milosia. Na ia taavalevale mamao atu ai i lalo i le auala. Na toe pa le isi pulufana ma taia i vao na saei atu i luga o lona ulu.

Na taoto taatia ai Monike, a o ia vaavaai atu ai i le va o vao, ma iloa atu le fitafita ua tu i luga. Sa lafi i tala atu o le auala, e tusa ma le afa o le va ma le fale piliki teu oloa. O lana fana sa i ona tauau, ua savali sa'o mai lava ia Monike.

Na faatalitali le fitafita o le a taamilo le fili i tua. Na ia lafi ai ma faatali, sauni e faauma.

Peitai, e le'i na o le fitafita na faatalitali ma saili e fasi.

*(soso'o atu Sulu Samoa Ianuari 2025)*

---

## ***FEAU O LE ASO*** *(mai le itulau 7)* *(Aso Lulu)*

O le satauro, ua fa'aalia ai le faatofalaiga mamana loloto a le Atua, e lē mafai e le poto o le tagata ona autalatalaina. O le koluse e kolosi ai le valea o le tagata. O le laau e faamasinoina ma faasala ai, o ē lē faatuatua. O le faailoga o le Atua na faaositaulaga lona tulaga Atua, a ua faa'ele'elea ina ia faaolaina le tagata agasala. A o le satauro foi o le manumalo, le satauro ua tuufua, o le Atua soifua faavavau, ua pule aoao, o le mana e fai ai vavega, o le malo o Keriso.

E iloa tagata faatuatua moni ia Keriso, i lo latou ola amo satauro, e tautua toto faasatauro, e faaositaulaga faasatauro tuinanauga ma isi manaoga o le tagata, a e faamuamua le mea o finagalo ai Keriso; a e lē na o le faalagilagi i laugutu ma nofonofu ffilemu, na o le sisi'i o lima, a e fefe e foa'i atu. O le a'oa'oga foi lea a lo tatou Alii le Atua, "*Ai se lē ave/amo lona satauro ma mulimuli mai ia te a'u, e lē aogā lea ia te a'u*" *Mata.10:38*. Ia manuia osiga taulaga ma le amoga satauro i le faaiuga o lenei tausaga.

Aso Tofi

Feau o le Aso: **Faamanuiaga o le tapua'i i se Atua moni.**

Faitau: Salamo 40: 1 – 5.

E le'i soona faamuamua e le Atua i ana tulafono, le tapu o atua ese, ma faasā tupua faapaupau. E i ai mafuaaga, na mamana ai faapea le faasologa. Sa mafai foi ona tasi le tulafono; peitai, ua faalua, ina ia tu matila lona finagalo paia mo lona nuu, ia e alofa atu ia te Ia, na o Ia lava, i lou loto atoa, ma lo'u ola atoa. Ia mamalu lona suafa, ia agiagia lana pule, i loto ma agaga o soo se auga tupulaga.

E itu lua lona faamoemoe. I le tasi itu, ua folasia lona toasa, lona fuā, lona tau ma sui, i tupulaga e tolu ma le fa o fanauga amiolētonu, e inoino atu ma tu'ua o Ia, a e mulimuli i atua ese. E aofia ai le au tapua'i faalēiloga, faa'afa'afa, faafoliga, femoumoua'i, faavaitaimi, lea ua taatele i aso nei. 'Aua e te fai mo oe; 'aua e te ifo i ai i ia faiga faapaupau.

A o le itu e sili ona tāua, ia matamata tetele faalualuga le sautualasi o ana faamanuiaga, i le afe o tupulaga, o e alolofa faamaoni, e tapua'i tutumau ia te Ia.

O le pese a Tavita o le pese a soo se tagata faatuatua ua na tofo i faamanuiaga o le tapua'i i le Atua moni. O manuia ma ala eseese o faaolataga, mai mala ma puapuaga. E ui ina sa lafoina i le lua e malaia ai, e pogisa, taaligoligoa ma palapalā, a e ua siitia a'e i luga ma aveina a'e i le malamalama, le saogalemu ma le saolotoga i laufanua lafulemu, ma le papa mautū e lē toe maluelue (40:2). E ui foi ina sa gūgū ma punitia lona leo, a ua matala lona gutu ma le laulaufaiva, e usu ma lagi le vi'i o le faafetai i lona Atua (40:3).

E manatua iinei, nisi tagata faatuatua faamaoni, pei o Iosefa ma Iopu, e ui ina sa tapua'i faamaoni i le Atua, a e na feagai pea ma puapuaga ma tiga, sa agaleagaina ma tuua'iina pepelo. E faapena le toatele o tatou tagata faatuatua faamaoni. O le tele o taimi na o puapuaga lava tatou te fetai'a'i, o siosiomaga o vanu palapala ma lua pogisa. Peitai, ua faamaonia i le i'uga o nei auauna, na faaeaina ma maua faamanuiaga e faavavau mulimuli ane. E faapena foi i tatou. E ui ina fetai'a'i pea ma tiga i lalo nei, ona o le mau ia Iesu Keriso, a e ua uma lava ona saunia le tau ma mautū i luga i le lagi, e lo tatou Alii o Iesu, e ala i lona maliu ma lona toetu, tatou te taunuu i ai ma olioli ai e faavavau.

Aso Faraile

Feau o le Aso: **Fesāga'iga ma atua ese (1).**  
Tusi Faitau: Faamasino 6: 25 – 32

Sa le'i faigofie le fesagaiga a Kitiona ma atua ese o Mitiana, o Paala ma Asaira, lea ua tapuai i ai le toatele o lona aiga ma lona nuu atoa. Ua na soloia i lalo fata faitaulaga ma tupua o Paala ma Asaira, a e fausia fata e sili ona tetele mo lona Atua; ua na osi foi le taulaga mu i le Atua, sa fa'aaoga i ai laau o le fata faitaulaga ia Asaira, na ia talepe i lalo. Na o le toa sefulu 'au a Kitiona na latou faia lea mea i le po, ona o le fefefe i tagata o lona aiga ma le nuu ua mulimuli uma i atua ese.

---

Ua iloa e le nuu ona latou o ane lea ia Ioasa le tamā o Kitiona, ina ia tuuina atu Kitiona e faasala i le oti, ona ua na lē anaana ia Paala. Peitai na faasaga atu Ioasa ua a’oa’i ua fai atu, *“O outou na, tou te finafinau ea mo Paala? Tou te fia laveaiina o ia? O le na te finau mo ia, ia oti lava ia i le taeao nei; afai o se atua o ia, ina faia e ia lava lana finauga, auā ua soloia e se tasi lona fata faitaulaga.”* O le aso lea na faamatai ai Kitiona ia **Ierupaala**, o lona uiga *Ia la finau ma Paala*.

E ui la ina faigata, a e na gaftia tiute o Kitiona na valaauina ai e le Atua, ona o le lagolago a lona tamā o Ioasa. E faigofie le taua faasaga i atua ese, ina ua tutū faatasi matua ma fanau, pei o Ioasa ma lona atalii o Kitiona. Ina ua lagolago le tamā ma le tina, i le taumafai o le atalii ma le afafine; ina ua lagolagoina e ta’ita’i se taumafai a tagatanuu, o ulu o Ekalesia e lagolagoina ni mau mai tagata lotu, e pei o le Toeaina e tutū faatasi ma faifeau ma a’oa’o ma tiakono, i le taumafaiga e soloia i lalo tu ma aga faapaupau, o atua ese o tu’inaana i le ‘oa ma le mamalu.

Peitai, afai e taumafai atu Kitiona ma se toasefulu itiiti e soloia i lalo tu ma aga faaPaala ma Fa’aasaira, a e solomua Ioasa ma le au matutua e opogi ona e oloa lu’ulu’u ma mamafa ai le taga, ona faigata lea o le fesagaiga ma atua ese.

Ua tele foi isi ituaiga tupua ua si’omia i tatou, e pei o tu ma aga masani e fai i le suafa o le Atua, ma le igoa o le fa’aaloalo, a o ufiufi ai le mana’o i mea o le lalolagi; e pei foi o suiga tele vavave faatekonolosi e aogā, a ua televave faatasi ai ma faiga faapaupau faapaala ma amio inosia faaasaira. Aemaise le silafia o soliga tulafono, a e salu i lalo o le kapeta faalilo ai. O le tagofia o fualaau oona, le gaosi ma le fasi tagata, le amio pi’opi’o ma faiga faatupu mala, o sauaga matagā, e lē o ni faiga ia o a’oa’o mai e lo tatou Alii o Iesu, a o amioga faa atua ese, o atua faapaupau. O le feau faamanatu mai, ia tatou maua le loto tele faa Kitiona, le faatuatua tatou te faasaga atu ai e tete ma faatoilalo faiga a le fili. O le fiafia faamasani e faitau le Tusi Paia, faamasani e tulivae i le tatalo i le ao ma le po, o nisi ia auala faigofie a e ogaoga, e tau ai le fitafita a Keriso, e fesagai ai ma ona fili. O auala tonu na, e pei foi ona sa faatoilalo ai e Iesu le fili o Satani, ina o la’ua fesaga’i. Ne’i tatou manatu i so tatou potu e i ai nisi auala fou faaonaponei e sili atu nai lo

lena! E leai. Ia manuia lou alofaiva i le fesaga’iga ma atua ese i lenei aso.

Aso Toonai

Feau o le Aso: **Fesagaiga ma atua ese (2)**.

Tusi Faitau: 1 Tupu 18: 20 – 40.

E lē uma le taua e fai, i le fesagaiga ma atua ese; auā e lē uma le amio faapaupau, o soliga tulafono, ma faiga amiolētonu i le lalolagi. Na feagai foi le perofeta o Elia ma lenei to’atuga, a o galue i aso na tupu ai i Isaraelu, o Aapo ma lana masiofo faapaupau o Iesepela mai Saitonu e ifo ia Paala. Lea na fai le sailiga o le atua moni i luga o le mauga o Karamelu, i le va o Elia ma le 450 perofeta a Paala, ma le 400 perofeta a Asaira. Na mu le taulaga a Elia, ma faamaonia ai o lona Atua, le ALII le Atua na osi feagaiga ma Isaraelu, o le Atua moni lea.

E maitauina i lenei manumalo o Elia, i le vavega na faia e le Atua, na mulimuli mai i le tatalo a le perofeta *“Ia e faafofoga mai ia te au, le Alii e, ia e faafofoga mai ia te a’u, ina ia iloa e le nuu nei o oe o le Alii o le Atua, ma ua e faaliliuina mai o latou loto.”* O le feau faamanatu mo i tatou, muamua, o le taua nei e fai fua, a ua manino le manumalo o le itutaua a Keriso, e pei ona sa iloa e ana perofeta ma aposetolo. Aemaise o Ia lava san a faatoilalo Satani i luga o le satauro. Ua faamalosi’au mai lo tatou Taitai’au, *“33 E maua outou e le puapuaga i le lalolagi, a ia outou loto tetele, ua ou manumalo i le lalolagi.”* Ioa.16.

E faapea foi ona faamalosi’au mai le aposetolo, *“Ia outou loto tetele i le Alii ma le malosi o lona mana. Ia oofu outou i outau atoatoa mai le Atua, ina ia outou mafaia ona tetele atu..”* O le tatalo faatuatua, ma le loto tele o le leo faaperofeta, e faatoilaloina ai mauga tetele a le fili ma ana ‘au, o pulega faasolitulafono ma faiga amiolētonu uma. Ia tatou mataala foi, auā o atua ese foliga eseese, e maua i totonu o maota ma laoa, i totonu o aiga, o fale faigaluega ma falea’oga, e oo lava i totonu o falesā, tainane o tatou lava mafaufau ma loto, pe a lē faautauta lelei.

**(Faatonu Sulu)**

---

## **GALUEGA EFKS SATITOA**

O le miti sa tuu i le Atua po o afea, a o le a se taimi ma se aso o le a faataunuaina ai. Peitai o lea ua faatu uto le saena ina ua mua atu mua mai, ua tini pa'ō ai le uto a e tau le 'ai e pei o le upu i le faiva o vai; auā o le faamoemoe ua taunuu o le laau lea o le soifua. O le Aso Lulu, 18 Tesema 2024 na umusaina ai le galuega o le Hall e tusa lona tau ma le \$640,000. O le faletua ia Matalena, faletua o le Toeaina o le Pulega Aleipata, a o le Toeaina Faatonu o le Matagaluega Lotofaga Lepa Aleipata, sa ootiina le lipine e faapaia ai le galuega, a o le susuga i le Taitaifono Fono Tele EFKS sa fai ma sui o le Laulau a le Ekalesia e saunoa ma momoli le meaalofa e \$10,000 a le Ekalesia mo le galuega. Na sosoo ai ma le taumafataga aemaise o faaaloaloga masani, ona lūlū aao lea ma faatofa.

E viia ai le alofa ma le agalelei o le Atua, auā ana le seanoa lona auai ma faatasi mai, e lē taunuu manuia lenei faamoemoe, auā o lenei galuega tele sa feagai lava ma le Autalavou i lona faatinoina ma lona tausiga. Ia aogā lenei fale i le atinaeiina o alo ma fanau aemaise o mea fai a le Ekalesia.

**Saunia susuga Vaituu Palale FS  
EFKS Satitua, ALEIPATA.**

## **NISI GALUEGA UA MAE'A**

O le masina nei na faapa'iaina ai nisi o galuega tetele a nisi Aulotu. O le EFKS Lotofaga (LLA) na faapa'ia i le Aso Sa, 29 Tesema le maota fou o le faafeagaiga. O le a nofoia le maota pe a taunuu mai le faifeau ma le faletua filifilia i le tausaga fou. O le EFKS Saanapu-uta sa faapea foi ona faapaia le maota fou mo le faafeagaiga susuga Denny Epati FS ma le faletua ia Puna. I le EFKS Lelepa, Pulega Gaga'emauga Itu o Tane, ua faafou tulaga uma o le galuega - ua suia le nofoaga fou ua fausia ai le maota fou o le susuga Ali Alapati FS ma le faletua ia Fogalele, faapea ma le maota fou o le galuega. Na molimauina e le Sulu Samoa lea nofoaga ma galuega tetele, a o lumana'i le faapa'iaina o galuega (silasila i ata o le galuega i le itulau muamua). O se tasi o tiute e nafa ma le afioga i le Taitaifono Fono Tele ma le faletua, lo la'ua auai e molimau, faapa'ia ma faaleo le faafetai a le Ekalesia, ma tauaao meaalofa e tatau ai.

**F. Sulu**

---

## **MAFUTAGA AUTALAVOU**

### **AOAO 2024**

#### **"IAMANATUA IESU I LOU TALAVOU"**

O le tausaga nei 2024 ua faato'a toe faia ai le Mafutaga Autalavou Aoa EFKS i Samoa, talu mai le tausaga 2018, ona o le Koviti19. O le Aso Lulu, 11 Tesema na faataunuu ai lenei faamoemoe i le Maota o Tupulaga EFKS i Mulinuu. Na o Matagaluega i Upolu sa mafai ona auai. E tolu vaega na tausinio i ai le nofo a Matagaluega: Pese Lotu, Pese Samoa, Siva Faaleagaga/Faaevagelia. O se suiga lelei na molimauina i lenei tausaga, ona sa mafai ona faatino, fai le laugatogi ma tufatufa faailoga, ma taape ai Autalavou i le itula e 4.00 i le afiafi, a e le'i ufitia e le pogisa.

O le afioga i le Taitaifono Komiti A'oa'oga Kerisiano, na ia ta'ita'iina le sauniga amata e tatala aloaia ai le mafutaga, ona lafo atu lea i le afioga Faatonu Aoaoga Kerisiano susuga Maleifua Tanielu FS ma le ofisa, mo le faatautaiga o le polokalame. O Faamasino o lenei mafutaga sa feagai lea ma Ofisa o le MAK. O le l'uga o le tausinioaga:

**Pese Samoa:** 1. Falealili Safata Siumu, Ipu, \$700  
2. Malua \$600, 3. Faleata \$500, 4. Lotofaga Lepa Aleipata \$400, 5. Apia Sasa'e \$400, 6. Vaimauga \$400, 7. Apia \$400, 8. Aana \$400.

**Pese Lotu:** 1. Faleata, Ipu & \$800  
2. Apia \$600, 3. Vaimauga \$500, 4. Malua \$400  
5. Apia Sasa'e \$400, Falealili S. Siumu \$400  
7. Lotofaga Lepa Aleipata \$400, 8. Aana \$400

**Faaevagelia:** 1. Falealili Safata Siumu, Ipu & \$600, 2. Apia \$500, 3. Apia Sasa'e \$400, 4. Vaimauga \$300, 5=Faleata \$300, Malua \$300, Aana \$300, 8. Lotofaga Lepa Aleipata \$300.

#### **Tuufaatasiga:**

1. Falealili Safata Siumu, Ipu Siamupini, \$1,000  
2. Faleata, Ipu & \$800, 3. Malua Ipu & \$600,  
4. Apia \$500, 5= Vaimauga \$500, Apia Sasa'e \$500, 7. Lotofaga Lepa Aleipata \$500, 8. Aana \$500.

Ua i ai le faamoemoe o le Komiti ma le Matagaluega, o le a ta'i 2 tausaga ma fai lenei Mafutaga, feauaua'i ma Taaloga Aoa o le a toe amatalia foi, aulia i le alofa o le Atua. **F. Sulu**

---

# O E UA FAI I LAGI FOLAUGA

## TUFITAUFOMEALELEMAILUGA

### TAUPA'U AIMEAMATA MISA

#### TAALOGA

(5/7/1940 – 3/12/2024) 84+4+29

*“Ua ou tau le taua lelei, ua i’u ia te a’u le tausinioga, ua ou taofi i le upu o le faatuatua.”*  
2 Timoteo 4:7.

O upu faamalosi’au ia a le aposetolo o Paulo mo Timoteo lona atalii faaleagaga, e faapea ai foi ma le au uso kerisiano uma lava i na ona po atoa ma nei ona aso. Ua filifilia e le fanau ma lona aiga e auga i ai sa latou faamatalaga o le soifua fa’aaogaina e le Atua o lo latou tina i tafa eseese o lenei soifuaga sa galue ai i totonu o le aiga, i le nuu ma le Ekalesia.

Na fanau i Sauano Fagaloa i le Aso Faraile, 5 Iulai 1940, mai ona matua ia Taupa’u Aimeamata ma Fuakoko Aimeamata. Sa faaipoipo ia Misa Pilitati Taaloga o Musumusua Fagaloa. Sa avea ai i la’ua ma tiakono ma le tofi A’oa’o Fesoasoani sa i le tamā o le aiga i le EFKS Musumusua.

O Vitoria Eseta Akeripa, o si ana tama teine lea ma lona toalua ia Teueli Akeripa ma le la fanau, o se tasi lea o matafale faavae o lenei aulotu talu mai le aso 4 Novema 2012, sa amataina ai le Lotu. O le mafuaaga lea o le oo mai o lenei tina i Falelauniu nei ma nofo tumau ai. O ia o se tina matua o lenei aulotu. E toaga ma fiafia e auai i sauniga, ma o lana tauloto tauave lea i si ana fanau, ina ia momoli mai o ia i le malumalu a o lei amataina sauniga o Aso Sa. E oo lava ina ua avea ma tina matua, ma ua po foi lana vaai, e muamua mai lava o ia i le malumalu. O se tina e po lana vaai, a e manino ma pupula tele mai ma malamalama mata o lona faatuatua ia Iesu ma lana faaolataga mo ia.

O se tina e agamalū, e toafilemu ma tauagafau ona uiga. Sa ia te ia ni meaalofa ma ni taleni se tele a le Atua sa fa’aauppegaina ai lona soifua faatina. E lelei lana siva, e i ai lana ukulele, e ta lava e ia pese ma pese fiafia ai, aemaise o pese

tuai ma pese fa’aanamua a Fagaloa ma Samoa. Sa fiafia e fagota ma fai le faiva o le tui fee. Sa avea ma faate’a numera tasi ma mulumu a le au kirikiti a Fagaloa

Na valaau le Atua i le tina, ma faamanava ana feau, i le Aso Lua 3 Tesema 2024, ina ua atoa ai le 84 tausaga, 4 masina ma aso e 29 le matua o lona soifua.

O a’u sa ta’ita’i i lona toe sauniga i le malumalu ma le tuugamau i le taeao o le Aso Gafua, 16 Tesema 2024 i le 10.00 i le taeao. O le susuga Nuufaigata Mulipola FS, faafeagaiga EFKS Musumusua, sa aumaia lona sa i totonu o le malumalu ma faitau le Tusi Paia. O le molimau a le fanau sa saunia e Vitoria Eseta Akeripa (o le aofaiga o fanau a fanau/grandchildren e 44, o le aofai o fanau a fanau a fanau/great grandchildren e 32, a o le aofaiga o i latou na tutupu mai ia te ia e 84). O le molimau o lona soifua faaleagaga sa faia lava e lana faafeagaiga o le EFKS Nuufou.

O talosaga sa feagai ma Iamafana Faauga FS, o le faifeau faau’u nofoaiga o la matou Ekalesia i Nuufou, a o le lauga na saunia e Ieti Tofaeono FS, o le faafeagaiga EFKS Sauano Fagaloa. Ona matou faai’u atu ai lea i le sauniga i lona oliolisaga tumau i lona aiga ma lo latou fanua i Vaipoto o Falelauniu Faleata, ma faatofa atu ai ia te ia i le Pese faatofa a le au kerisiano, Pese 268 “Talofa uso e, tofaina oe, Ua sau le itupo e malolo, E ala oe pe a mavae le po, Tofa, tofa, tofa!”

Na faai’u le aso fiafia o le tina, i osiga taulaga e ala i taumafataga ma fa’aalologa masani ai i aso faapenei, o pelega a fanau ma aiga mo lo latou tina. Faafetai le alofa, ia faamanuia le Atua.

Ia manuia lau malaga Tufi.

*Saunia susuga Letaulau Aloiai Poufā*

*Pesaleli FS*

*EFKS Nuufou, Vaipoto i Falelauniu,*

*MATAGALUEGA FALEATA.*



---

**TUFITAUFAOMEALELEIMAILUGA TAUPA'U AIMEAMATA MISA**  
**TAALOGA**



**MAOTA O LE GALUEGA (HALL) EFKS SATITOA,**  
**ALEIPATA.**

